

共同經課 - 1 使徒行傳七章五十五節~六十節

55 獨獨司提反互聖神充滿，注目看天，看見上帝的榮光，耶穌倚佇上帝的大旁，56 就講：「看啊！我看見天開，人子倚佇上帝的大旁。」57 in大聲喉叫，掩耳孔，同心挨夾伊，58 趕伊出城，用石頭擲伊。做干證的人將in的衫下佇少年人名叫掃羅的腳前。59 in用石頭擲司提反，司提反求講：「主耶穌啊，接納我的神！」60 閣跪落去大聲叫講：「主啊！莫得用此個罪歸佇in！」講息，就暈。掃羅也歡喜伊死。

共同經課 - 2 詩篇三十一篇一節~五節，十五節~十六節

1 〔大衛的詩，交互樂官。〕耶和華啊，我倚靠你；求你互我永永無見諂；照你的公義拯救我！2 求你俯耳孔聽我，緊緊來救我！做我堅固的石磐，做拯救我的衛所！3 因為你是我的山巖，我的山寨；所以，求你因為你的名來引導我，指點我。4 人暗靜張羅網欲網我，求你救我脫離，因為你是我的衛所。5 我將我的靈魂交佇你的手；耶和華真實的上帝啊，你有救贖我。15 我的遭遇佇你的手；求你救我脫離我的對敵的手以及窘迫我的人。16 求你互你的面照光你的奴僕，照你的慈愛拯救我。

共同經課 - 3 彼得前書二章二節~十節

2 就著親像抵仔生的嬰仔欣慕神靈專的奶，互恁對長大到得著救。3 恁若試著知主是慈善，就著按呢。4 伊是活石，互人棄揀，若是互上帝揀選、珍重。5 恁就近伊，也親像活石，起做神靈的厝，做聖的祭司班，來獻神靈的祭，對耶穌基督會互上帝歡喜接納的。6 因為聖經有記載講：看啊！我用所揀選、所珍重的厝角頭要緊的石下佇郇城；信伊的人不致見諂。7 按呢，彼個寶貝是歸佇恁信的人，若是佇許個唔信的人就：起厝的師傅所棄揀的石，成做厝角的頭塊石。8 又閣：做跋倒人的石，礙著人的石磐。in 唔順趁道理，來跋倒；會到按呢是本定著啲。9 獨獨恁是揀選的族，是王也是祭司，是聖的邦國，是上帝家己的百姓，互恁傳報彼個召恁出黑暗入伊美妙的光者的好德。10 恁前唔是百姓，今是上帝的百姓；前無受憐憫，今有得著憐憫。

共同經課 - 4 約翰福音十四章一節~十四節

1 「恁的心莫得迫腹；恁著信上帝，亦著信我。2 佇我的父的家有多多厝宅；若無，就我已經給恁講啦。因為我去是給恁備辦所在。3 若去給恁備辦所在，就欲閣來接納恁歸佇我，互我所佇啲的，恁亦佇遐。4 我所去的所在，恁識彼條路。」5 多馬給伊講：「主啊，你去的所在阮都唔知，豈會知彼條路啊？」6 耶穌給伊講：「我就是路、是真理、是活命；若無對我，就無人就近父。7 恁若已經識我，就亦識我的父。今了後，恁識伊，亦曾看見伊。」8 腓力給伊講：「主啊，用父互阮看，就夠額。」9 耶穌給伊講：「腓力，我及恁恁到即久，你猶唔識我嗎？已經看見我的，就是看見父；你怎樣講『用父互阮看』啊？10 我恁佇父，父亦恁佇我，你唔信嗎？我所給恁講的話，唔是出佇家己來講，就是父住佇我來行伊的代誌。11 我恁佇父，父恁佇我，恁著信我；若無，就著因為所行的事來信我。12 我實實給恁講，信我的人，我所行的伊欲行伊，就比諸個事卡大的亦欲行伊，因為我歸佇父。13 恁佇我的名凡所求的，我欲行伊，互父佇子得著榮光。14 恁若佇我的名有所求我的，我欲行伊。」